

DEUS EX TWINGO

edo maitasunaren komenentziak

DEUS EX TWINGO

edo maitasunaren komenentziak

* * * * *

JOSETXU- Eta... hemen dela diozu?

MIRENTXU- Bai.

JOSETXU- Bai.

MIRENTXU- Bai horixe.

JOSETXU- Ederra. Lekua. Ederra dela. Diot.

MIRENTXU- Bai.

JOSETXU- Eta a ze hotza. Ezta?

MIRENTXU-...

JOSETXU- Bueno... eta?

MIRENTXU- Eta, zer?

JOSETXU- Zerbait gertatuko al da?

MIRENTXU- Nork daki.

Isiltasuna.

JOSETXU- Zigarreta bat?

MIRENTXU- Ez dut erretzen.

JOSETXU- Oso... meditatiboa.

MIRENTXU- Bai, horrek lagundu egiten du.

JOSETXU- Ez nuke nahi deskuiduan lo hartu... Berandutzen ari zaigu.

MIRENTXU- Ordu bata hamar gutxi.

Isiltasuna.

JOSETXU- Ba nik ez dut ezer ikusten. Nora begiratu behar dut?

MIRENTXU- Zerura.

JOSETXU- Zerura.

MIRENTXU- Zerura, bai.

JOSETXU- Bai, zerura.

MIRENTXU- Bai.

JOSETXU- Soineko polita.

MIRENTXU- Zerura.

JOSETXU- Zerura, bai, bai.

Isiltasuna.

JOSETXU- Aizu, eta.../?

MIRENTXU- Josetxu, ez bazara isiltzen ziur egon ez duzula ezer ikusiko.

JOSETXU- Bai, noski... Barkatu...

Isiltasuna.

JOSETXU- Ez dakit Mirentxu... nik beste zer edo zer espero nuen...

MIRENTXU- Zer?

JOSETXU- Ez dakit... agian... ezer...

MIRENTXU- Ba orduan.

Isiltasuna.

JOSETXU- Non esan duzu egiten zenuela lan?

MIRENTXU- Esan dizut, lantoki batean.

Isiltasuna.

JOSETXU- Banengoen ba ni. Lan egiten duzun tokia lantoki bat izango da, noski...

Isiltasuna.

JOSETXU- Zer nolako lantokia?

MIRENTXU- Lana egiten den horietako batean/ isilik egon al zaitezke pixkatxo batez, mesedez?

Isiltasuna.

JOSETXU- Berriro pintatu behar izan dut. Kotxeaz ari naiz. Twingoa. Makina bikaina benetan.

MIRENTXU- Ez da harritzekoa.

JOSETXU- Baina ez da ezer gertatzen, e? Harramazkei buruz ari naiz.

MIRENTXU- Barkamena eskatu nizun.

JOSETXU- Ez, ez, ez! Ez zen zure errua izan.

MIRENTXU- Badakit, bai.

JOSETXU- Bueno, apur bat bai, izan zen, baina...

MIRENTXU- Nahigabe izan zen, eta nik ere mina hartu nuen.

JOSETXU- Bai, bai. Badakit. Azken finean... Twingo bat besterik ez da, ez? Ibilgailu bat. Eta ibilgailu bat... ibiltzeko gailu bat besterik ez da. Ezta?

MIRENTXU- Halaxe da.

JOSETXU- Bueno, ez da bakarrik hori baina... tira.

Isiltasuna.

JOSETXU- Baina barren-barrenean... pozten naiz. *(isiltasuna)* Zu? *(isiltasuna)* Esan nahi dudana zera da: zorte handia izan genuen. Guk elkar ezagutzea... ezta? *(isiltasuna)* Azken finean...

MIRENTXU- Sssssh...

JOSETXU- Noiz edo noiz patuak ere aukera bikainak ematen dizkigu. Istripu hori izan ez bagenu...

Magia dirudi, ezta?

MIRENTXU- Bai, bai. Magia, bai.

Isiltasuna.

JOSETXU- Hau guztia apur bat arraroa egiten ari zait.

MIRENTXU- Hau guztia... zer?

JOSETXU- Gurea. Gureari buruz hitz egiten ari naiz.

MIRENTXU- Gurea? Josetxu, gure bigarrenko zita besterik ez da.

JOSETXU- Ba horixe bera. Gure lehenengo zita Usurbilgo kafetegi batean izan zen, bi garagardo, braba batzuk, urduritasuna, lotsa... gauza horiek guztiak... Baina gaur... gauerdia Jaizkibelen...

MIRENTXU- Ez da gauerdia. Ordu bata zazpi gutxi dira. Gauerdia zera da... gauaren erdia.

JOSETXU- Bueno ba... hori. Baina gauza zera da/

MIRENTXU- Zerbait gertatzen al da?

JOSETXU- Ez ba. Ezer ere ez. Dirudienez.

MIRENTXU- Zer?

JOSETXU- Ezer ez. Ez dut ezer esan.

MIRENTXU- Josetxu, argi eta garbi esan nizun. Hilabeteko lehenengo ostiral gaua sakratua da niretzako. Jaizkibelera igotzen naiz zeruko OHEak ikustera.

JOSETXU- Oheak ikustera? Hara, bai ba, hortik biskoelastiko bat pasatzen ikusi dutela entzun dut.

MIRENTXU- OHEak. Objektu hegalari ezezagunak.

JOSETXU- Ba oheak badira ez dira ezezagunak. (*Barre egiten du berak bakarrik. Isiltasuna*) Lehengo egunean plan zirraragarri bat iruditu zitzaidan. Egia esan ez nekien egun horrelako gauzetan sinisten zuen jendea zegoenik.

MIRENTXU- Zer esan nahi du “horrelako gauzetan”?

JOSETXU- Ezer, ezer.

MIRENTXU- Ez, ez. Esan ba!

JOSETXU- Esan nahi nuena da... interakzio handiagoa espero nuela gure artean.

MIRENTXU- Lasai, iheskorrak dira, baina agertuko dira.

JOSETXU- Ez, ez. Ez didazu ulertu. (*Barre egiten du irribarre urduriarekin, Mirentxuk isilik jarraitzen du*) Gu bion arteko interakzioaz ari nintzen. Eta gu bion artean, oraingoz isiltasuna besterik ez dago. Eta hotza. Ostia, a ze hotza egiten duen hemendik... Normala da honelako hotza garai honetan?

MIRENTXU- Josetxu... zer espero zenuen?

JOSETXU- Zer? Ezer! Tira... biok elkarrekin, bakarrik, gauean, Twingo batean eta honelako bistekin...

MIRENTXU- Hara! Azkenean agerian utzi duzu zure burua.

JOSETXU- Barkatu Mirentxu. Baina ez naiz ez perbertitu bat, ezta desesperatu bat ere. Eta gainera ekuazio ximpleak egiten badakizkit: bat gehi bat, berdin bi.

MIRENTXU- Hori ez da ekuazio bat. Hori gehiketa bat da.

JOSETXU- Bueno, ba, dena delakoa. Begira, Mirentxu, gauzak ondo hasi dira gure artean. Ezta?

MIRENTXU- Bai?

JOSETXU- Bueno, kotxeari egin zenionaz aparte... Baina hori jada iragana da! Gauza zera da... agian apur bat hitz egingo bagenu... Zu ezagutu nahi zintudan, besterik ez. Zure ogibideaz jakin... hori guztia.

MIRENTXU- Esan dizut. Lantoki batean egiten dut lan. Eta bide batez, niri buruz ezer jakiteko, nire gustuak ezagutu beharko zenituzke. Kasu honetan, OHEak.

JOSETXU- Bai, eta nik ere gustuko ditut! Bai eta bertan egiten den guztia!

MIRENTXU- Aizu, txiste memeloak egiteari utziko al diozu behingoz!

JOSETXU- Barka, Mirentxu, baina akrostiko hori arraroegia iruditzen zait. Ez al dago "Ovni" erabiltzerik?

MIRENTXU- Ez da akrostiko bat, akronimo bat baizik. Eta Euskaltzaindiak OHE besterik ez du onartzen.

JOSETXU- Ja. Noski. Euskaltzaindiak mugikorrerako sega-potoa onartzen du, baina burutik jota egon behar zara hitz hori erabiltzeko.

Isiltasuna.

JOSETXU- Behintzat hitz egingo bagenu...

MIRENTXU- OHEak isiltasunean begiztatzen dira.

JOSETXU- Eta erlazioak solasaldiekin hasi ohi dira.

MIRENTXU- Josetxu, benetan diotsut, inork ez zaitu behartu hona igotzera. Zuk etorri nahi izan duzu.

JOSETXU- Ba... "Ovni"ak aitzakia bat besterik ez zirela uste nuelako!

MIRENTXU- OHEak ez dira aitzakiak. Niretzako OHEak azken helburua dira.

JOSETXU- Orain ze ohe tipologiaz ari zara?

MIRENTXU- (*grazia egin dio txistek baino ez du erakutsi nahi*) Ergel halakoa...

JOSETXU- Barre egin duzu.

MIRENTXU- Zer?

JOSETXU- Barre egin duzula. Grazia egin dizu eta irribarre bat atera zaizu!

MIRENTXU- Ez da egia...

JOSETXU- Bai, bai...

Isiltasuna.

JOSETXU- Benetan gogoko dut zuk honelako zaletasun bitxiak izateak. Mundua pertsona normalez beteta dago.

MIRENTXU- Beraz, ados! Kontzentratu gaitezen beraz.

JOSETXU- Bestalde... niri bost axola katolikoa ala musulmana zaren.

MIRENTXU- Zer?

JOSETXU- Ba hori... sinismenak ez zaizkit axola niri.

MIRENTXU- Aizu, horiek erlijioak dira. Eta nirea beste alde batetik doa.

JOSETXU- Bai?

MIRENTXU- Zientzia, Josetxu, zientzia.

JOSETXU- Zientzia.

MIRENTXU- Horixe baietz. Ezagupena.

JOSETXU- Ezagupena.

MIRENTXU- Hain zuzen ere.

Isiltasuna.

JOSETXU- Tira... zuk esaten baduzu...

MIRENTXU- Nik esaten dut, bai.

JOSETXU- Esan dizut nik psikologia estudiatu nuela, ezta?

MIRENTXU- Lehengo egunean esan zenidan, bai. Hori ezagupenaren beste adar bat da.

Interesgarria benetan.

JOSETXU- Bueno... Nire ustez... agian... zientzia alde horretatik doa.

MIRENTXU- Alde horretatik?

JOSETXU- Bai ba, egiak sakabanatzen dituen aztarna xeheen zelata.

MIRENTXU- Ados nago zurekin. (*Zerura begira*) Aztarna xeheen zelata.

JOSETXU- Ze lata, bai, ze lata. Begira, nik ez dakit gehiegi ohelogiaz, baina/

MIRENTXU- Ufologiaz.

JOSETXU- Hori ba, ufologiaz. Baina argi eta garbi dago estralurtarren aztarnak aski ezkutatuak daudela.

MIRENTXU- Bueno, zuk psikoanalisian sinisten duzu eta estralurtarrak bezain ezkutatua dago hori guztia.

JOSETXU- Barkatu baina ni konduktuala naiz.

MIRENTXU- Pozten naiz. Ni ordea Arrasatekoa. Orain, inporta ez bazaizu...

Isiltasuna.

JOSETXU- Eta mamuetan?

MIRENTXU- Zer?

JOSETXU- Fantasmak. Horietan ere sinisten duzu?

MIRENTXU- Ez. Ez dut heriotzaren ondorengo bizitzan sinisten.

JOSETXU- Tira. Horretan ez.

MIRENTXU- Ez.

JOSETXU- Baina plater hegalarietan bai.

MIRENTXU- Ez da gauza bera.

JOSETXU- Ez. Inolaz ere.

MIRENTXU- Aizu, Josetxu. Ohituta nago nire lepotik barre egiten duten pertsonekin.

JOSETXU- Nik ez dut barrerik egin.

MIRENTXU- Bale. Baina normalean ez ditut hona ekartzen zu bezalako pertsonak.

JOSETXU- Ni bezalako pertsonak?

MIRENTXU- Jakin gabe edozer gauza zalantzan jartzen duten horietakoak.

JOSETXU- Jende askorekin igo zara hona?

MIRENTXU- Zer? Hori ez zaizu batere inporta.

Isiltasuna.

JOSETXU- Ondo da. Orduan, azaldu iezadazu!

MIRENTXU- Azaldu zer?

JOSETXU- Ba hori. Zergatik plater hegalariak bai, eta arima galduak edo zombiak ez.

MIRENTXU- Probabilitate hutsa. Bilioika planeta unibertsoan. Bilioika, diot. Eta deus ez inon?

Batean ez ezik? Eta kasualitatez, gurea da hori. Ez al da arraroa?

JOSETXU- Tira, lau mila milioi emakume munduan eta nik ohelogo bat gustuko dut. Estatistikek susto handiak eman ohi dituzte.

MIRENTXU- Ufologoa.

JOSETXU- Dena delakoa.

MIRENTXU- Entzun. Behin bakarrik azalduko dizut, ados?

JOSETXU- Ados.

MIRENTXU- Duela hilabete batzuk ke zutabe batzuk aurkitu zituzten Europan.

JOSETXU- Ke zutabeak? Normala, Islandian geiserrak daude, ezta?

MIRENTXU- Europa, Jupiter!

JOSETXU- Bikaina! Orain esango didazu, Europa Jupiterren dagoela? Zer izango da hurrengoa?

Lurra laua dela?

MIRENTXU- Europa Jupiterren dagoen satelite natural bat da.

JOSETXU- A...

MIRENTXUk hasperen egiten du.

JOSETXU- Hara! Ez nekien... Eta? Zer gertatzen da?

MIRENTXU- Europa izotzez beterik dagoen planeta bat da.

JOSETXU- Ondo.

MIRENTXU- Eta izotza ura da.

JOSETXU- Bikain.

MIRENTXU- Eta Geiserrak aktibitate magmatikoa dagoenean sortu ohi dira.

JOSETXU- Zuzena.

MIRENTXU- Beraz, beroa eta... ura!

JOSETXU- Spa bat jarri nahi al duzu Europan?

MIRENTXU- Bizitzaren oinarria hidrogenoa, oxigenoa eta beroa da. Likidoa eta berotasuna! Justu-justu sexua bezala. Eta argi dago zu horren bila zentozela hona.

JOSETXU- Aizu, nik ez dut horrelakorik esan!

MIRENTXU- Estatistika gordina da! Ez al zinen zientzialaria?

JOSETXU- Psikologoa. Langabea.

MIRENTXU- Ba hori! Bilioika planeta unibertsoan eta bakarrik bi bizitzarekin. Eta kasualitatez bata bestearen ondoan!

JOSETXU- Urteak dira ez didatela horren gauza erromantikorik esan.

MIRENTXU- Zer?

JOSETXU- Halaxe da gure istorioa! Pentsatu momentu batez! Pentsatu! Bi planeta. Bakoitza bere bidea jarraitzen, unibertsoan biraka... bata besteari kasurik egin gabe, bere izateaz tutik ere jakin gabe. Zu, espazio zabalean norabiderik gabe: Europa bezala, zure bizikletan Matia kalea zeharkatzen eta ni, Jupiter, nire Twingoan errepidean, nire bidea jarraitzen, mantso-mantso, eta bat batean/

MIRENTXU- Ni Europa eta zu Jupiter?

JOSETXU- Zer?

MIRENTXU- Ni zure satellite bat naizela iradokitzen ari al zara? Horra hor patriarkatu galaktikoaren adibide bikaina...

JOSETXU- Barkatu, baina ni nire bidetik nindoan, eta zuk... zuk meteorito bat bezala nire kontra izugarrizko zartakoa jo zenuen.

MIRENTXU- Hara! Orduan dinosauroen desagertzearen errua nire gain botatzen hasi zara, jada.

JOSETXU- Nik ez dut horrelakorik esan. Baina gaia ateratzen baduzu, zera esango dizut... dinosauroena bezalako hondamendiaz ari gara... ikusi al dituzu kotxeak jaso zituen harramazkak?

MIRENTXU- Zenbat aldiz eskatu behar dizut barkamena?

JOSETXU- Et, et, et! Nik barkatu dizut jada!

MIRENTXU- Bizitzan denok izan ohi dugu istripuren bat. Argi dago nirea zu zeu izan zinela.

JOSETXU- Bizitzan esan didaten bigarren gauzarik politena da hori.

Isiltasuna.

MIRENTXU- Barkatu...

JOSETXU- Zer?

MIRENTXU- Ez da komentario polita izan... barkatu.

JOSETXU- Tira... izotzez beteriko satelite hotz bat izan arren, sentimenduak ere baditut nik ere.

Isiltasuna

JOSETXU- Ulertzen dut.

MIRENTXU- Zer?

JOSETXU- Badakit zertarako zatozen hona. Beste bizitza posible baten bila.

MIRENTXU- Bai?

JOSETXU- Lur honetan aurkitzen ez duzun horren guztiaren bila zabilta.

MIRENTXU- Hori guztia?

JOSETXU- Maitasuna: Objektu Hegalari ezezagunena.

Mirentxuk barrez hasten da

JOSETXU- Planeta isolatu bat zarela argi eta garbi ikusten da. Jupiter bezala, harri gordinez egindako planeta ibiltaria zara.

MIRENTXU- Jupiter ez da harrizkoa. Gasez beteriko planeta erraldoi bat da.

JOSETXU- (*Nazka aurpegia jartzen du*) Inporta ez bazaizu, nire metafora nahiago dut. Pentsa... han goian nor edo nor guri begira balego zer pentsatuko zukeen? Bi pertsona xume maitasun zinezkoaren bila. Eguzki baten berotasuna sentitzeko irrikan. Sentimendu xumeak unibertso zabal batean noraezean. (*Isiltasuna*) Pozten naiz zu nire kontra jo izanak. Zurekin pasatako gau honek lurreko dinosauro guztien bizitza balio izan du.

MIRENTXU barrez hasten da.

JOSETXU- Zer?

MIRENTXU- Ama! A zer nolako erromantizismo merkea! Duela bi minutu aspertu aurpegia zenuen eta orain...

JOSETXU- Begira! Jada nazkatu naiz! Goazen oraintxe bertan etxera. Bakoitza bere etxera. Argi gelditu ez bazaizu.

MIRENTXU- Zer?

JOSETXU- Sentimendurik gabeko emakumea zara! Alperrik da zurekin... Twingoaren pintura berria zuk zeuk ordaindu beharko zenuke! Azken finean zuk probokatu zenuen istripu hura!

MIRENTXU- Trastu zahar horrek ez du pezeta bat ere balio. Eta nik mina ere hartu nuen zure leihotxoaren kontra eta ez nizun ezer esan!

JOSETXU- Zer esan duzu?

MIRENTXU- Bai ba, begira nire kopeta/

JOSETXU- Ez, ez. Zer da esan duzun beste hori?

MIRENTXU- Zure baparezko tramankulu zahar hori buruz?

JOSETXU- Hau ez da tramankulu zaharra! Hau Twingo bat da. Ingeniaritzaren mugarri bat.

MIRENTXU- Zer?

JOSETXU- Dirutza bat gastatu nuen klasiko honengatik eta ez ditut jasango horrelako komentarioak.

MIRENTXU- Dirutza bat?

JOSETXU- Hamabi mila euro!

MIRENTXU- Hamabi mi/ baina nori erosi zenion?

JOSETXU- Kolekzionista bati!

MIRENTXU- Kolek/

JOSETXU- Kotxe hau bitxikeria bat da! Diseinuaren arrakasta bat. Ohe bilakatzen da momentu batean.

MIRENTXU- Objektu hegalari ezezagun bat?

JOSETXU- Ez. Ohe bat. Lo egiteko horietako bat! Begira. Laurogeita hamabiko perla bikaina. Berdingabea.

MIRENTXU- Hori esan zizun saltzaileak?

JOSETXU- Noski baie/ zer?

MIRENTXU- Josetxu, iruzur egin dizutela uste dut.

JOSETXU- Iruzur, niri? Ez ba! Klasiko bat da. Ukitu besterik ez duzu egin behar.

MIRENTXU- Plastikozkoa da. Ez da inoiz kotxe klasikoa izango.

JOSETXU- Nola esplikatzen duzu orduan pinturaren prezioa?

MIRENTXU- Pinturaren prezioa?

JOSETXU- Bi mila bostehun euro ordaindu behar izan nuen pinturarengatik.

MIRENTXU- Bi mila bostehun euro? Baina zer/ pintura ere garaikoa zen?

Isiltasuna.

MIRENTXU- Ezin dut sinetsi. Laurogeita hamabiko pintura erosi zenuen?

JOSETXU- Laurogeita hamahirukoa. Laurogeita hamabikoa ez zen zegoen jada.

MIRENTXU- Noski ez zegoela. Eta hurrengo urtekoa ezta ere. Pintura batek ezin du horrenbeste iraun. Iraungita dago!

JOSETXU- Potean halaxe jartzen zuen!

MIRENTXU- Josetxu, esna zaitetz! Pote bat da!

JOSETXU- Zer?

MIRENTXU- Pote bat, pote bat da. Eta barnean dagoena pintura berria izan daiteke.

JOSETXU- Barkatu baina saltzaileak zin egin zidan.

MIRENTXU- Zer saltzaile? Twingo-aren saltzaile berbera?

Isiltasuna. MIRENTXU barrezka hasten da.

JOSETXU- Bitxikeria bat da. Ingeniaritza mugarrria... Klasikoa. Antikuario baten makina perfektua.

MIRENTXU- Nola otu zitzaizun honelako kafetera bat erostea?

JOSETXU- Erosketa bikaina izan zen. Inbertsio ezin hobea eta segurua. Hemendik urte batzuetara dirutza bat balioko du.

MIRENTXU- Hori ere zure mekanikoak ezan zizun? (*barrez*) Tipo hori presentatu behar didazu.

Negozioen jenio bat.

JOSETXU- Etekin handiko inbertsio segurua.

MIRENTXU- Josetxu. Benetan, inuzenteak bilatu ohi ditut hona igotzeko, baina inoiz ez naiz zu bezalako mozolo batekin igo.

JOSETXU- Klasiko bat dela esan dut, klasik/ Zer esan duzu?

MIRENTXU- Zer?

JOSETXU- Esan duzun hori, esan berriro.

MIRENTXU- Nik ez dut ezer esan.

JOSETXU- Inuzenteak bilatu ohi dituzula.

MIRENTXU- Nik ez dut horrelakorik esan.

JOSETXU- Bai, esan duzu. Zera esan duzu, inoiz ez zarela ni bezalako mozolo batekin igo.

MIRENTXU- Maitemindu. Beti inuzenteekin maitemintzen naiz. Hori esan dut.

JOSETXU- Ez! Ez da egia! Ez duzu hori esan...

MIRENTXU- Josetxu ez daukat denborarik zure gaizki ulertu/

JOSETXU- Momentu bat... Mirentxu... ez esan...

MIRENTXU- Zer?

JOSETXU- Benetan inozoa naiz! Ez zeneukan norekin igotzerik, ezta? Inork ez zuen zurekin igo nahi eta zuk kotxerik ez duzunez... Nitaz gogoratu zinen!

MIRENTXU- Zer? Ez! Badaukat kotxea...

JOSETXU- Bai? Eta orduan zergatik ez duzu erabiltzen?

MIRENTXU- Nik ez... ez zait... ez dut gustuko. Ez dut gidatzen...

JOSETXU- Lehenengo zita ondo joan zenez gero... hortxe ikusi zenuen aukera.

MIRENTXU- Baina nola otu zaizu horrelakorik! Ni zure kotxearen kontra nahita bota nintzela esaten ari zara?

Isiltasuna

JOSETXU- Ez. Ez nintzen hori guztia esaten ari, baina...

Isiltasuna. MIRENTXU hitzik gabe gelditzen da.

JOSETXU- Zer? Istripua nahita eragin zenuela??? Mirentxu, ostia! Ibilgailu historiko bat dela!

MIRENTXU- Sardina-lata bat besterik ez da!

JOSETXU- Mirentxu, izugarrizko sustoa eman zenidan eta... eta... hori guztia hona igotzeko autorik ez zeneukalako...

MIRENTXU- Esan dizut kotxea daukadala!

JOSETXU- Eta orduan zergatik ez zara zurearekin igotzen.

MIRENTXU- Esan dizut... ez... Ez dut gustuko eta kitto!

JOSETXU- Aitzakiak! Kotxe guztia harramazkatu zenidan ovni puta batzuegatik!

MIRENTXU- OHEak, ez Ovniak! Errespetu pixka bat!

JOSETXU- Baina zer errespetu! Ez duzu inorengan errespeturik!

MIRENTXU- Hara bestea! Larrua jotzeko besterik igo ez dena!

JOSETXU- Ba begira, halaxe da! Maiteminduta gaudenok egin ohi dugun aktibitate bat da hori.

MIRENTXU- Badoa berriro... maitasunaren aitzakia edozer gauzarako erabiltzen... Eta zer demontre uste duzu dela maitasuna? Komenentzia besterik ez!

JOSETXU- Banekien ba nik. Lehenengo zitan istripuaren faktura eskatu behar nizula...

MIRENTXU- Komenigarria bilakatu dugun sentimendu baxuena besterik ez/ Zer?

JOSETXU- Zer?

MIRENTXU- Istripuaren faktura eskatu nahi zenidala?

JOSETXU- Laurogei eta hamahiruko pintura zen! Dirutza bat.

MIRENTXU- Lehenengo zitan.

JOSETXU- Agian ez zegoen besterik.

MIRENTXU- Baina ez al daukazu asegurririk?

JOSETXU- Bai, nik bai! Baina zuk ez! Gainera, aseguruiek ez dute laurogeita hamahiruko pintura estaltzen.

MIRENTXU- Laurogeita hamahiruko potea!

JOSETXU- Ez zaitetz horrekin berriro hasi!

MIRENTXU- Benetan hori al da flirteatzeko daukazun teknikarik hutsezinena? Maitasuna, zein sentimendu zintzoa!

JOSETXU- Nik ez nuen zurekin flirteatu nahi!

MIRENTXU- A ez? Orduan zer nahi zenuen, fakturaren zenbatekoa besterik gabe?

JOSETXU isiltasuna

MIRENTXU- Fakturaren dirua lortzeko besterik ez zenidan deitu?

JOSETXU- Gaur egun jendea oso mesfidatia da. Jakin izango bazenu ez zinen etorriko. E... eta... eta gainera, telefono zenbakia zuk niri eskatu zenidan, eta orain badakigu zergatik! Erosi ezazu kotxe bat, eskumotz!

MIRENTXU- Kotxea dudala esan dizut. Baina zu... Diruaren bila bakarrik zenbiltzan!

JOSETXU- Ez da egia! Ez egia osoa, behintzat...

MIRENTXU- Zer?

JOSETXU- Fakturaren erdia eskatu nahi nizun. Hori bakarrik. Tratu adeitsua, gizon gizabidetsu baten tratua.

MIRENTXU- Tira! Iritsi gara behingoz gakora! Hortxe dugu gure erromantikoa!

JOSETXU- Baina ez nuen egin! Ez nizun euro bat ere eskatu. Gure artekoa BEZ-ik gabeko mila berrehun eta berrogeita hamar euro baino garrantzitsuagoa zela uste izan nuelako.

MIRENTXU- Alajaina! Zure alboan Bilintx amateur hutsa da...

JOSETXU- BEZ-ik gabe dela esan al dut?

MIRENTXU- Benetan al diozu?

JOSETXU- Baina iritziz aldatu nuen, eta/

MIRENTXU- Ikaragarria...

JOSETXU- Eta lehenengo zitan primeran pasa genuen eta/

MIRENTXU- Sinesgaitza...

JOSETXU- Eta zer demontre! Zu ere ez zinen motz gelditu! Nire sentimendu zintzoekin jokatu zenuen.

MIRENTXU- Sentimendu zintzoak! Ez iezadazu barregura eragin, mesedez. Esaten nuena, komenentzia besterik ez dago maitasunaren azken helburu bezala!

JOSETXU- Nik behintzat maitatzeko gai naizela erakutsi dut!

MIRENTXU- Larrua jotzeko gai zarela besterik ez duzu erakutsi! Maitasunaren komenentziaren azken kate-maila.

JOSETXU- Begira, Mirentxu, begira... Begira zure estralurtar miresgarriei... Zer egingo zuten gizatasuna horren baxu erori dela ikusiko balute? Maitasunaren baloreak ere errespetatzen ez direla ikusita...

MIRENTXU- Kotxe zikin batengatik!

JOSETXU- Behintzat nire ibilgailua benetakoa da, ez zure plater hegalaria bezala!

MIRENTXU- Ibilgailua, bai! Hitz ezin hobea! Ibiltzera gonbidatzen zaituen gailua!

JOSETXU- Manipulatzailerik galanta!

MIRENTXU- Eta zu, inozoa!

JOSETXU- Eroa!

MIRENTXU- Inbertitzailea!

JOSETXU- Zatozte, zatozte, martetarrak! Zatozte gu salbatzera!

MIRENTXU- Inbertitu ezazu Twingo batean, ez zara damutuko!

JOSETXU- Oraindik ikusteko dago hori! Zure martetarrak bezala!

MIRENTXU- Hitz egingo dugu piezak fabrikatzeari uzten diotenean!

JOSETXU- Zure buruko piezak duela asko ez direla fabrikatzen!

Argi bat agertzen da. Eta soinu miresgarri bat entzuten da. Pixkanaka biak gora begiratzen dute.

JOSETXU- Sinestezina...

MIRENTXU- Baina ze demontre! Hori...

JOSETXU- Horiek...

MIRENTXU- Haiek dira...

JOSETXU- Estralurtarrak...

MIRENTXU- Banekien... arrazoia nuen... Aitortu ezazu...

Pixkanaka-pixkanaka begiradarekin OHE-a jarraitzen dute beren buru gainetik alde bateraino.

JOSETXU- Nora doa?

MIRENTXU- Ez dakit.

JOSETXU- Zer ari da egiten?

MIRENTXU- Twingora hurbiltzen ari da.

JOSETXU- Klasikoaren edertasuna ikusten ariko dira.

MIRENTXU- Zer?

JOSETXU- Arrazoia nuen, onartu ezazu.

MIRENTXU- Zergatik ari da lebitatzen zure autoa?

JOSETXU- Baina, nora daramate...?

MIRENTXU- Ez dakit...

JOSETXU- Abduzitzen ari dira!

MIRENTXU- Hau izarrarteko ate bat da... banekien...

JOSETXU- Eta?

MIRENTXU- Argi dago. Ezin da bertan aparkatu.

JOSETXU- Zer? Nola? Ez! Itxaron! Ez ezazue eraman! Enkargu batzuk egiten besterik ez nintzen ari!

Itxaron, itxaron! TAO ordaintzera nioan!

JOSETXU mutis.

MIRENTXU- Horrexegatik ez nuen nire kotxea erabiltzen. Banekien era batean edo bestean garabia pasako zela. Agertu zarete azkenean...

MIRENTXU mutis eta

Amaia.